

Sa seguresa in sa massaria

Cun su Testu Ùnicu subra sa seguresa, D.Lgs 81/08 finas pro sa massaria b'at impòsitos pro su chi pertocat sa seguresa in sos logos de traballu pro amparare sa salute de sos traballadores.

Sas normas si praticant in totu sas aziendas agriculas cun traballadores dipendenti francu pro unas cantas categorias de pessones chi sunt sugetas petzi a s'art. 21 de su decretu. Pro custas categorias est obligatòriu a pònnere petzi mèdios de amparu e atrezaduras de traballu cunforme a sos disponimentos de su titulu III.

Custos si charent, podent, finas, fàghere sas bìsitas mèdigas e cursos de formatzione subra sa salute e sa siguresa in su traballu.

In sas aziendas agriculas cun traballadores dipendenti, su mere est obligadu, imbetzes, pro amparare sos traballadores a unos cantos impòsitos. Sos de prus importu sunt:

- 1) Inditare su Responsabile de su Servìtziu Preventzione e Protetzione.
- 2) Inditare sos responsàbiles *Antincendio e Primo Soccorso*.
- 3) Inditare su Dotore cumpetente (cando est prevididu).
- 4) Fàghere sas bìsitas mèdigas a sos traballadores.
- 5) Fàghere sa Valutazione de sos Arriscos e ammaniare su Documentu de valutazione de sos Arriscos o ammaniare s'autocertificazione

In sas aziendas finas a 10 dipendenti balet s'autocertificazione, imbetzes in sas aziendas cun prus de 10 traballadores tocat de ammaniare su Documentu de Valutazione de sos Arriscos.

- 6) Dare a sos traballadores mèdios de amparu e preventzione addatos.
- 7) Comunicare a s'INAIL sos datos chi pertocant sos infortùnios in su traballu.
- 8) Comunicare su nùmene de su Rapresentante de sos Traballadores pro sa Seguresa.

Màchinas agriculas

Un'òbrigu de importu mannu pro sos massajos est su de addatare sos tratores a sas normas de seguresa de sas atrezaduras de traballu prevididas dae su puntu 2.4 de sa parte II de s'allegadu V de su D.Lgs. 81/08. Cunforme a cust'òbrigu, totu sos massajos (meres e traballadores autònomos) depent averguare sas normas de seguresa de sos tratores e machinas agriculas e, si est pretzisu, los depent addatare.

A custu propòsitu est bene a nàrrere, chi sos servìtzios Spresal de sas ASL, segundu su Pianu Regionale pro sa seguresa in sa massaria, dae su mese de trìulas de su 2011, ant a

fàghere controllos pro averguare su respetu de sas normas de siguresa de sas atrezaduras e de sas màchinas agrìculas siat in sas butegas chi las bendent siat in sas aziendas agrìculas. S'avertent duncas, sos massajos a averguare comente sunt sos tratores e sas àteras atrezaduras aziendales, mescamente sas màchinas betzas e a las addatare.

Pro èssere a norma, totus sos tratores, a rodas o tzingolados, depent giùghere unu mèdiu de amparu, si capitat de si ribaltare (cabina o telàiu), e sas tzinturas de seguresa.

Si su trattore non giughet telàiu su massaju si lu depet fàghere addatare dae unu mecànicu autorigiadu.

Si su telàiu omologadu pro cussu modellu de trattore non b'est prus, podet èssere fraigadu sighende sos inditos de s'IspeI *“L'installazione dei dispositivi di protezione in caso di ribaltamento nei trattori agricoli o forestali”*.

A cada manera su mecànicu at a dèpere lassare a su massaju una decrarazione de comente su telàiu est istadu postu a norma, o, si fraicat su telàiu, at a dèpere lassare unu tzertificadu de cunformidade a sos inditos de s'IspeI e una decrarazione de comente su telàiu est istadu postu a norma.

Si su trattore non giughet tzintura de seguresa cheret a l'addattare averguende si su sedile, fissu o mobile, giughet tretos pro arratulare. Finas pro custu su mecànicu depet sighire sos inditos de s'IspeI.

Su massaju depet collire totu sos documentos lassados dae su mecànicu e los depet bogare a campu si li faghent unu controllu.